

NAQQIUT

Saqqummiussissut 10. marts 2017-imi ullulerneqartoq taarserpaa

Tunngavigisaq

Tusarniaanermut akisummik inatsisinik teknikkimut tunngasumik kingusinaarluni takkuttoqarnera tunngavigalugu, siunnersuummut naqqiummik nassiussisoqarnissaa pisariaqartutut isigineqarsimavoq.

Akilaraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisissaattut siunnersuut

Saqqummiussissut

(Aningaasaqarnermut Akileraartarnermullu Naalakkersuisoq)

Siullermeerinnineq

Akilaraaruserinermik ingerlatsineq pillugu Inatsisartut inatsisaata allanngortinneqarnissaanik siunnersuut Naalakkersuisut sinnerlugit matumuuna saqqummiuppara.

Naatsorsuuserinermi pitsaassutsip annertusarneqarnissaa siunertaralugu akilaraaruserinermik ingerlatsineq pillugu Inatsisartut inatsisaata ullutsinnut naleqqussarneqarlunilu nutarterneqarnissaa Naalakkersuisut siunnersuuteqarnermikkut kissaatigaat. Pitsanngoriaat ilaatigut elektroniskiusumik akiligassiisalernissamut ikaarsaariarnermut maanna ingerlanneqartumut atasutut isigineqassaaq. Akiligassiissutit imarisassaat pillugit piunasaqaatinik aalajangersaanissamut Naalakkersuisut piginnaatinneqarnissaat siunnersuutigineqarpoq.

Akileraartarnermik aqutsiviup aalajangigai Akilaraarusiinermik aalajangiisartunut naammagittaalliutigineqarsinnaanngitsut, matuma ataani assersuutigalugu allagaatinik takunnissinnaatitaaneq pillugu suliani aalajangiinerit, ullumikkut Aningaasaqarnermut Naalakkersuisoqarfimmut suliassanngorteqqinneqarsinnaapput. Taamatut periuseqarneq ilaatigut tulluannngissinnaasarpog, tassa innuttaasup inatsisitigut illersugaanerata pitsanngoriaateqarneranik kinguneqanngissinnaasumik nukissanik atuiffiusumik sulianik ingerlatsinermik tamanna nassataqarsinnaammat, tassami akileraartarnermik aqutsivik

sulianut aalajangersimasunut atatillugu ilisimasaqarnerullunilu suliassa qarfinni pineqartuni immikkut ilisimasaqarfiummat.

Taamaattumillu siunnersuutigineqarpoq, naammagittaalliorfissat killilerneqarnissaannut inatsisinik eqqussisoqassasoq. Matuma ataani Akileraartarnermut ingerlatsiviup suliat aalajangiiffigisimasai Akileraartarnermut Aalajangiisartunut naammagittaalliutigineqarsinnaaneri kiisalu sulisunut suliani, arsaarinninnermut imaluunniit pineqaatissiissutinut suliani Akileraartarnermut ingerlatsiviup aalajangiineri, kiisalu allagaatinik takunnissinnaaneq pillugu aalajangiinerit allattoqarfimmut allamut naammagittaalliutigineqarsinnaassanngitsut.

Kiisalu aningaaserivinni pensionisiassanik ileqqaaruteqarnissap periarfissaalernerata kingunerisaanik allannguutaasariaqartunik siunnersuut imaqarpoq.

Naggasiullugu inatsisissatut siunnersuut tassungalu nassuiaatit innersuussutigaaakka.

Taama oqaaseqarlunga siunnersuut Naalakkersuisut sinnerlugit Inatsisartunut oqaluuserisassanngortippara, tamatumalu kingorna Aningaasaqarnermut Akileraartarnermullu Ataatsimiititaliami suliarineqareernermi kingorna aappassaaniigassanngortillugu.